

wirdig vnd gestrengen vnser rethe vnd liben getruwen er Jurge von Hugewitz techand zcu Miessen, canczler, er Nickel von Schonenberg ritter vnd ander vnser manne vnd dyner gloubwirdiger gnug. Geben zcu Miessen am montag noch Oculi noch gotis geburte tausent vierhundert vnd darnach im funff vnd funffzigistenn iaren.

Nach dem Orig. im Rathsarchiv zu Meissen mit dem Siegel an einem Pergamentstreifen.

No. 109. 1455. 29. Mai.

Kurfürst Friedrich II. erlässt, da die Stadt abermals ein Brandunglück betroffen (vgl. No. 102), den Theil der Jahrrente, der auf die durch Feuer beschädigten Bürger fällt, auf zwei Jahre.

Wir Friderich von gots gnaden hertzog zcu Sachsen ꝛc. bekennen ꝛc., das wir vmb flissiger demutiger bete willen vnser lieben getruwen burgermeister ratmanne vnd gesworne vnser stat Missen vnd sunderlich angesehen großen schaden brandiß halben obir sie gegangen, dieselben vnser burger zewee jar von dato dises briefes nocheinander folginde des teils vnser jarrente, als die durch das fuwer itzund beschediget sind wurden geben musten vnd solden, gefryet haben vnd frien sie der gnedighen mit vnd incraft dises briues also bescheidenlichen, das yn die geschosse als vff den verbranten erben vnd husern gestanden haben die gnanten zewei jar alleyn, abgehen vnd sie vns an vnsern jarrenten die tzyt vß souil deste weniger zugeben schuldig sin sollen. Wanne aber die tzwei jar vmbkomen vnd vßsin, so sollen sie vnd ire nochkomen vns vnd vnsern erben vnser jarrente wider gantz vnd vor vol geben vnd reichen, inmaßen alsuor herkomen ist, vnd behalden gleichwol vor vns vnd vnser erben die jarrente als vff den verbranten husern vnd erben stehen vns ledighen zuzufolgen mitsampt vnser gemeynen lantfolge vnd allen andern dinsten, die sie vns pflichtig sind, des alles hiemit nicht gefriet zu sin ane alles geuerde. Zcu vrkunde ꝛc. Datum Missen quinta post Vrbanii anno domini ꝛc. L quinto.

Nach dem Cop. 44 fol. 125 im K. Haupt-Staatsarchiv zu Dresden.

No. 110. 1455. 27. Dec.

Wir Friderich von gots gnaden hertzog zcu Sachsen ꝛc. bekennen ꝛc., das wir Hansen vnserm cammerknechte vnd lieben getruwen vmb siner getruwen vnd annemer dinste willen, die er vns vil iare noch eynder flissiglich getan hat in vnsern landen furstenthum vff vnsern slossen vnd in feltzogen vnd herfarten hinfurder tun sal vnd mag — vnser usser torampt vff vnserm slosse zcu Missen verlihen vnd reichen — vff syne lebetage mit allem dem das dartzu gehoret vnd sine furfarn gehabt vnd gebrucht haben — dasselben torampts zcu genißen vnd zugebruchen, das getruwelich zcuuerwesen mit vff vnd tzuslissen vnd anders dabie zcuthune, also eynem gehulten geswor-nem torwarten zcuthune mit verwarung vnser slos ergesten vnd schaden, so furderst er mag, wol fuget. Zcu vrkunde ꝛc. Datum Missen sabato Johannis ewangelistae anno domini ꝛc. LVI^{to}.

Nach dem Cop. 44 fol. 270 wie No. 109.